

Lajčák: Evropa mora ponovo usmjeriti pažnju ka Bosni i Hercegovini



Evropska unija mora ponovo usmjeriti pažnju ka Bosni i Hercegovini, rekao je danas u Londonu visoki predstavnik i specijalni predstavnik EU, Miroslav Lajčák. Visoki predstavnik i specijalni predstavnik EU sastao se sa britanskom ministricom za evropska pitanja Caroline Flint.

Visoki predstavnik i specijalni predstavnik EU istakao je da će međunarodna zajednica morati da razmotri štetu koju su poslijeratnom oporavku Bosne i Hercegovine i njenim izgledima na putu u evropske integracije nanijele neodgovorne izjave i taktika političara iz oba entiteta.

Visoki predstavnik i specijalni predstavnik EU obavijestio je ministricu Flint o pomacima načinjenim kako bi se ispunilo pet ciljeva i dva uvjeta koje je postavio Upravni odbor Vijeća za implementaciju mira u februaru. Rekao je da domaće stranke još uvijek nisu postigle sporazum koji bi im omogućio da ispune dva uvjeta: pravičnu i sistematsku podjelu državne imovine te rješavanje ustavnog statusa Brčkog. Istovremeno, izgledi za ispunjenje drugog uvjeta – kako bi Vijeće za implementaciju mira bilo u prilici da donese pozitivnu procjenu situacije na osnovu punog poštivanja Daytonskog mirovnog sporazuma – sve su lošiji.

Visoki predstavnik i specijalni predstavnik EU više će

govoriti o ovoj temi tokom svoga večerašnjeg obraćanja na Fakultetu ekonomskih nauka u Londonu (*London School of Economics*). Reći će da se Bosna i Hercegovina uglavnom, i to s pravom, smatra uspješnim primjerom međunarodne poslijeratne intervencije, ali će pozvati međunarodnu zajednicu da ostane u potpunosti angažovana jer BiH i šira regija "neće biti u potpunosti sigurni sve dok se svi ne integriraju u Evropsku uniju i NATO."

Lajčák će upozoriti da nepostojanje napretka u ustavnoj reformi znači da može doći do odlaganja članstva u EU budući da, "kao što je komesar EU za proširenje Olli Rehn više puta naglasio, Bosna i Hercegovina ne može težiti članstvu sa ustavom koji državi uskraćuje mogućnost da donosi ili provodi zakone EU, odnosno ustavom koji krši evropske standarde ljudskih prava sa više aspekata."

U svom obraćanju, visoki predstavnik i specijalni predstavnik EU će reći da kada OHR bude konačno zatvoren, mandat Ureda specijalnog predstavnika EU će se morati ojačati da bude "usaglašen sa jedinstvenim (i jedinstveno teškim) okolnostima u BiH."

"Bosna i Hercegovina zaslužuje i zahtijeva poseban tretman," reći će on. "Ona nije uobičajeni kandidat za članstvo u EU i ne može sama ispuniti uobičajene uslove i pristupne kriterije EU."

Visoki predstavnik i specijalni predstavnik EU se nalazi u Londonu u okviru serije konsultacija koje obavlja prije održavanja sastanka Upravnog odbora Vijeća za implementaciju mira, koji je planiran za ovaj mjesec, a koji će razmotriti pitanje kako riješiti političke prepreke koje su zaustavile napredak poslijeratnog oporavka BiH i njene evro-atlantske integracije.